

ԱՐԵՎՍՏԱՀԱՅ ՄԱՍՈՒԼԻ ՍԿՋԲՆԱՎՈՐՄԱՆ ԵՎ ԶԱՐԳԱՑՄԱՆ
ՊԱՏՄՈՒԹՅՈՒՆՆԻՑ (1832—1914)

Պատմ. գիտ. դոկտոր Ա. Ա. ԽԱՌԱՏՅԱՆ

Արևմտահայ մամուլի սկզբնավորումը կապվում է Կ. Պոլսի և Զմյուռ-
նիայի հայ համայնքներում աղգային ինքնագիտակցության, մշակույթի և
հասարակական մտքի զարգացման հետ։ Նրա հայտնության գործում նախա-
պատրաստական կարևոր նշանակություն ունեցան հայ զաղթօջախներում
արդեն ձևավորված աղգային պարբերական հրատարակությունների ավան-
դույթները, որոնք ամենից առաջ սկիզբ էին առնում հայերեն առաջին ամ-
սագրից՝ Հ. Շմավոնյանի խմբագրությամբ Մադրասում հրատարակված «Ազ-
դարարից» (1794—1796)։ Արևմտահայ առաջին պարբերականներում «Ազ-
դարարից» ժառանգված այդպիսի ավանդույթներից էին աղգային ինքնու-
թյան պահպանության, համախմբման ու միասնության, հայ եկեղեցու և նոր
ժամանակներում ստեղծվող հոգևոր ու մշակութային արժեքների ներդաշնա-
կության ու զարգացման, հայրենի բնաշխարհում աղգովին ամփոփվելու զա-
ղափարները։ «Ազդարարից» էր սկիզբ առնում նաև արևմտահայ մամուլի
արշավույսին իսկ նրա էջերում դրսևորված սեեռուն ուշադրությունը Ռուսաս-
տանի, հայ ժողովրդի հետագա կյանքում այդ երկրի ու նրա ժողովրդի ունե-
նայիք կարևոր նշանակության նկատմամբ, որ ի վերջո պետք է հասցնե-
ր որոշակիորեն ձևավորված ռուսական կողմնորոշման՝ արդեն 1840-ական թթ.
(«Արշավույս արարատյան», «Հայրենասեր»)։ Եվ վերջապես, նորահայտ արև-
մտահայ հրատարակությունների բնութագրական դիժը՝ աղգային արժեք-
ների հետ այլ ժողովուրդներին ծանոթացնելու, տյյև առհասարակ քաղաքա-
կրթության նվաճումներին հայությանը հաղորդակցելու լուսավորական ձեգ-
աումները դարձյալ սկիզբ էին առնում հայերեն առաջին պարբերականի հաս-
տատած ուղեգծից։ Կանգնած լինելով հին և նոր ժամանակների սահմանա-
գծին, «Ազդարարը» հենվում էր անցյալի վրա այնչափով, որչափով անհրա-
ժեշտ էր հաստատուն քայլեր անել աղգի առջև հայտնված անծանոթ ու դժ-
վարին ուղիներով անցնելու համար։ Հայ մամուլում դրսևորված հասարակա-
կան միտքն ու լուսավորական գաղափարախոսությունը անհրեքիորեն վկա-
յում էին, որ այդ անցումն ու ընթացքը արդեն կայացել է։

Արևմտահայ մամուլի սկզբնավորման համար մի որոշ չափով հոգ նա-
խապատրաստեցին նաև Մխիթարյանների գործունեությունն ու փորձը։ Վեր-
ջիններին վենետիկյան պարբերականները («Տարեգրություն», «Եղանակ Բյու-
զանույան», «Դիտակ Բյուզանույան») դեռևս XIX դարի առաջին տասնամյակ-
ներին տարածվում էին հայ զաղթավայրերում, մասնավորապես Օսմանյան
Թուրքիայի հայաբնակ շրջաններում՝ թողնելով իրենց անպայման քաղաքա-
կրթիչ ազդեցությունը։ Կ. Պոլսի և Զմյուռնիայի հայկական պարբերական-
ների սկզբնավորման և զարգացման հարցը քննարկելիս չպետք է աչքաթող
անել նաև Օսմանյան կայսրությունում 1839 թ. սկսված թանդիմաթի շափա-
վոր բարենորոգումները, որոնք այս կամ այն կերպ խթանեցին կայսրության
հպատակ ժողովուրդների մշակութային զարգացման միաումները։

Արևմտահայ մամուլի զարգացման առաջին շրջանը ընկնում է 1830—
1850-ական թթ., երբ թուրքական ու եվրոպական հրատարակությունների
կողքին ինքնուրույնաբար սկզբնավորվում են աղգային լրագրությունն ու հրա-
պարակախոսությունը, մշակվում է արևմտահայ լրավական համակարգը,

որի ամենակարևոր առանձնահատկությունը ազգային, նպատակաուղղվածությունն էր: Այս առանձնահատկությունը արդեն բավական նկատելի է Թուրքիայում լույս տեսած հայերեն անդրանիկ պարբերականի՝ «Լրո գրի» (1832—1850) էջերում, որը Թուրքական պաշտոնաթերթ «Թաքվիմ-ի վեքայի» հայերեն տարբերակն էր: Սակայն, ի տարբերություն Թուրքական պաշտոնաթերթի, «Լրո գրի» տպագրել է արևմտահայ կրթական ու հասարակական կյանքին վերաբերող լուրեր, նույն բնույթի նյութերի արտատպություններ այլ հրատարակություններից և այլն:

«Լրո գրին» հետևեց Թուրքիայում հրատարակված երկրորդ պարբերականը՝ ամերիկյան բողոքականների «Շտեմարան պիտանի գիտելյաց» ամսագիրը (Ջմյուռնիա, 1839—1854), որ հետամտում էր դավանական նպատակներ: Կտրված լինելով ազգային իրականությունից, այս պարբերականը, սակայն, որոշակի արժեք է ներկայացնում արևմտահայ աշխարհաբարի մշակագործման և ապա իր ժամանակի համար բավական բարձր՝ լրագրական կուլտուրայի տեսանկյունից: Եվ այս կտրվածքով (ազգային բովանդակության առումով) առաջին պարբերականներ կարելի է համարել «Արշալույս արարատյանը» (Ջմյուռնիա, 1840—1884) և «Ազդարար բյուզանդյանը» (Կ. Պոլիս, 1840—1841), ինչպես և «Հայրենասեր» (Ջմյուռնիա, 1843—1846) թերթը: Ի դեպ, Ջմյուռնիայում հրատարակված «Արշալույս արարատյանը» և «Հայրենասերը» առաջինն էին արևմտահայ լրագրության մեջ, որոնք առաջ քաշեցին արևմտահայ և արևելահայ (ինչպես նաև գաղթավայրերի) հոգևոր միասնության խնդիրը, առանձնացնելով Ռուսաստանի դրական նշանակությունը հայության քաղաքակրթության գործում: Չնայած իր քարոզչության, մասնավորապես միջազգային քաղաքականության ընկալման հարցում «Արշալույս արարատյանը» ի հայտ է բերել մի որոշ էկզեկտիվ, այսուհանդերձ, զգալի երախտիք ունի հայ զույգ հատվածների մտավորականության մերձեցման ասպարեզում: Հակառակ «Արշալույս արարատյանի» հետ ունեցած գաղափարական տարածայնությունների, այդ թերթի արժանիքները ժամանակին բարձր էր գնահատում Մ. Նալբանդյանը²:

1840-ական թթ. լրագրության, ուրեմն և լրատվության դերն ըստ արժանվույն գնահատելով՝ Կ. Պոլսի հայոց պատրիարքարանը ձեռնամուխ է լինում իր պաշտոնաթերթի՝ «Հայաստանի» (Կ. Պոլիս, 1846—1852) հրատարակությանը: Պաշտոնաթերթի՝ ի սկզբանե ուրվագծվող սահմաններում իսկ «Հայաստանը» սրտացույց է Կ. Պոլսի հայ հանրության ներքին տեղաշարժերը, նրա պահպանողական և նոր, լուսավորական մտածողության ու կողմնորոշումների տեղ մտավորականության միջև եղած հակասությունները: «Հայաստանը» խմբագրել են նաև Հ. Չամուռճյանը (Տերոյենց)՝ պոլսահայ պահպանողական և ուղղափառ կրոնական հայացքներ դավանող այդ դործիչը և այլն: Հետևելով Մ. Աղաթոնի՝ Թուրքիայի և արևմտահայ համայնքի արևմտականացման համոզված կողմնակիցներից մեկը: Մ. Աղաթոնի խմբագրության ժամանակ «Հայաստանը» առաջադիմական դիրքերից առաջադրել և պաշտպանել է ազգային նորովի կրթության, երկրագործության, արհեստագործության ու առևտրի տրոհական բարգաժման խնդիրները: «Արշալույս արարատյանի» հետ միասին «Հայաստանը» լայն տեղեկատվություն է տվել ոչ միայն Օսմանյան Թուրքիայի այլև եվրոպական տերությունների քաղաքական ու հասարակական անդուդարձերի, մշակույթի ու գիտության զարգացման վերաբերյալ: Արևմտահայ մամուլի լրատվության սահմանների սյապիսի ընդար-

1 Մ. Գ. Ն ա ռ ա ի ս յ ա ն. Հայ ժողովրդի նոր պաամության էջերից. Երևան, 1982, էջ 154:

2 Ս. Հ. Մ խ ի թ ա Ր յ ա ն. Արևելահայ մամուլի սկզբնավորումը և լուսավորական շարժումը. Երևան, 1994, էջ 332:

3 Վ. Գ. Ղ ո լ կ ա ս յ ա ն. Պոլսահայ մամուլի և հրատարակատեսության սկզբնավորումը. Երևան, 1975, էջ 208—254:

ձակու մը վկայում էր նրա ընթերցողի հետաքրքրության նոր միտումների մասին, այն փաստի մեջ, որ ձևավորվում է լրատվության ազգային բովանդակությունը և նրանում, որ արևմտահայ մամուլը կայացել է:

1840—1850-ական թթ. ի հայտ են գալիս արևմտահայ առաջին տաղանդավոր հրապարակախոսներն ու լրագրողները, որպիսիք էին Գրիգոր Գրիգորյանը («Լրոյ դիր»), խաչատուր Օսկանյանը («Ազդարար բյուզանդյան»), Ղուկաս Պալաուդարյանը («Արշալույս արարատյան»), Մ. Աղաթոնը, Ն. Զորայանը («Հայաստան») և ուրիշներ, որոնք հայ մամուլ էին ներմուծում ժամանակակից լրատվական մշակույթը, իրենց անհատականության կնիքը դնում ազգային լրատվության ժանրային առանձնահատկությունների վրա:

1850-ական թթ. աննախընթաց լայն իրազեկությամբ, հասարակական կյանքի, մշակույթի, աշխարհաբարի, դպրոցի ու մանկավարժության, նոր դրակոնության վերաբերյալ իր հրատարակած հարուստ հրապարակումներով առանձնանում է «Մասիս» թերթը (Կ. Պոլիս, 1852—1908)՝ արևմտահայ ամենաերկարակյաց պարբերականը: «Մասիսը» կատարել է Կ. Պոլսի հայոց պատրիարքարանի պաշտոնաթերթի դերը (հաջորդել է «Հայաստանին»)՝ թեև իր լրատվությամբ ու հիմնախնդիրների ըմբռնումով գրեթե միշտ էլ գերաճել է դուռ պաշտոնաթերթի շրջանակներից և արտացոլել արևմտահայ ազատամարտության գաղափարներն ու կողմնորոշումները: «Մասիսը» իր լուրջ և հասարակականորեն ազդեցիկ խոսքն է ասել ազգային կյանքի համար այնպիսի կարևոր խնդիրներում, ինչպիսիք են ազգային սահմանադրության, հայ իրականության մեջ եկեղեցու և հոգևորականության դերի, Արևմտյան Հայաստանի բարենորոգումների, Հայկական հարցի, հայ գրականության զարգացման ուղիների, արևելահայ հատվածի ու հայ գաղթախոսների հետ մտավոր և մշակութային ներթափանցման և այլ հարցերում: Երկար ժամանակ այս թերթը խմբագրել է նրա հիմնադիր Կ. Ություճյանը (սկզբից մինչև 1884 թ.), որից հետո, տարբեր ժամանակներում՝ Ա. Արփիարյանը, Գր. Զոհրապար, Հ. Ասատուր, Սիպիլը, Մ. Շամտանճյանը, Տ. Արփիարյանը:

1850-ական թթ., կապված արևմտահայ գրականության զարգացման միտումների հետ, հրատարակվել են առաջին գրական պարբերականները՝ «Բանասիր» (1851—1852, 1859) և «Արփի արարատյանը» (1853—1856), առաջինը Կ. Պոլսում, մյուսը՝ Զմյուռնիայում: Դրանք տպագրել են և՛ ինքնուրույն, և՛ թարգմանական ստեղծագործություններ:

1850-ական թթ. արևմտահայ մամուլում առաջին անգամ դրսևորվեցին սուրթանական բնույթի մամուլային ղեկավարներ, թուրքական ու քրդական բռնազատիչներին ընդդիմանալու և պաշտպանվելու դադափարները: Արևմտահայ ընթերցողի մեջ այս տրամադրություններն էր արծարծում Մ. խրիմյանի խմբագրությամբ Վանում և ապա Կ. Պոլսում լույս տեսած «Արծվի Վասպուրական» (1855—1874, ընդհատումներով) շաբաթաթերթը: Շատ ուշագրավ է, որ այդ շաբաթաթերթը սկզբից իսկ քննադատական դիրք բռնեց պոսահայերին Բ. Դուռն կողմից տրված՝ այսպես կոչված «ազգային սահմանադրության» նկատմամբ, իր զուսպ և իրատես կողմնորոշմամբ դաստիարակության մղելով այդ կանոնադրության տրեքը չափազանցնող պոսահայ խանդավառ դործիչներին: Ժամանակի արևմտահայ շատ պարբերականներից «Արծվի Վասպուրականը» շահեկանորեն տարբերվում էր նաև արևմտահայ գովառի իրական դրություն լուսաբանման, ժողովրդի հարստահարյալ կացության բացահայտման անկեղծ ձգտումով:

1850-ական թթ. ժանրային ինքնահաստատման ուղին բռնեցին արևմտահայ ելույթական հրատարակությունները: Ակնեբեաբար, Կ. Պոլսի «Զվարճասիրաց» ընկերությունը ընդառաջում էր ժողովրդի տրամադրություններին ու պահանջներներին, երբ ձեռնարկում էր «Զվարճասիրաց» երկրորդական շաբաթաթերթի (1855—1856) հրատարակությունը: Իր մեկամյա գոյության ընթացքում «Զվարճասիրաց» խոր հետք չթողեց երգիծական մամուլի, մանավանդ նրա ժանրերի մշակման գործում, սակայն կարևոր դեր կատարեց արև-

մըտահայերի երգիծանքի և հումորի զգացումները իրրե մշակույթ ներկայացնելու իր առաջին փորձով: Այդպիսի փորձը վերածվեց արվեստի իսկական դրսևորման՝ Հ. Սըվաճյանի «Մեղվի» (1856—1874) հրապարակ իջնելով: Իրականության երգիծական ընկալման, ժողովրդական երգիծանքի ավանդույթների զարգացման իմաստով «Մեղուն» շուրջ մեկ և կես տասնամյակ մնաց արևմտահայ երգիծանքի առաջապահիկը՝ անկրկնելի մնալով իրականության երգիծական պատկերման ու երգիծական-լրագրական ժանրերի զարգացման ասպարեզում:

1850-ական թթ. խորանում են արևմտահայության մտավոր ու մշակութային շփումները Արևմտյան Եվրոպայի հետ, որը մի հայտնի չափով արևմուտքի հետ Օսմանյան Թուրքիայի տնտեսական ու քաղաքական մերձեցման, և հետևաբար, արևմտահայ բուրժուառևտրական խավերի արտաքին տնտեսական կապերի արդյունքն էր: Այս գործում իրենց կարևոր նշանակություն ունեցան Եվրոպայում գործող հայկական մտավոր ու կրոնական հաստատությունները, առանձին գործիչներ: Նկատի ունենք Ֆրանսիայում և Անգլիայում իրենց բնույթով ու նպատակաուղղվածությամբ զուտ արևմտահայ կյանքի հետ կապված մամուլի հանդես գալը: Դրա նախօրինակը արդեն տվել էին Մխիթարյանները, որոնք դեռևս դարասկզբին Վենետիկում նախաձեռնած իրենց հրատարակություններով հիմնականում կողմնորոշվում էին դեպի արևմտահայ ընթերցողը⁴: 1855 թ. Փարիզում սկսում են հրատարակվել Ստ. Ոսկանյանի «Արևելքը» (դադարել է 1856 թ.) և Գ. Այվազովսկու «Մասայաց աղավնին» (մինչև 1859 թ.): Իրենց ըմբռնումներով դրանք միանգամայն տարբեր, նույնիսկ հակոտնյա հրատարակություններ էին, սակայն յուրաքանչյուրն իր չափով և սահմաններում լրացնում էր հայ հասարակական միտքը և նրա առանձնահատուկ կողմերը: Ազգային կյանքի հիմնահարցերի, եկեղեցու, օսմանյան հասարակության ու արտաքին քաղաքական կողմնորոշման, լուսավորության և առհասարակ ազգի զարգացման ուղիների հարցերում ունենալով բեռնաշնորհ տարբեր պատկերացումներ, այս պարբերականներն ունեին նաև շատ կարևոր մի ընդհանրություն՝ նպաստում էին արևմտահայ մտավոր ու հոգևոր կապերի ամրապնդմանը եվրոպական, և առաջին հերթին ֆրանսիական մշակույթի հետ: Դրանից հետո Փարիզում Ստ. Ոսկանյանը խմբագրում էր «Արևմուտք» հանդեսը (1859, 1864—1865), Ա. Մուրատյանը՝ «Փարիզ» շաբաթաթերթը (1860—1863), Մանչեստրում Կ. Շահնազարյանը՝ «Երկրագունտ» թերթը (1863—1864): Մինչև դարավերջ և այնուհետև Փարիզում տպագրվեցին «Մազկոցաձոր», «Համայնք», «Անահիտ», «Բանասեր» և այլ պարբերականներ, խոհունում՝ «Հայաստան», «Մարտը», «Նոր կյանք», Ստոկհոլմում՝ «Քննասեր», Վառնայում՝ «Հույսը» և «Իրավունք», ԱՄՆ-ում՝ «Արեգակը», «Եփրատը» և բազմաթիվ այլ պարբերականներ: Եվ վերջապես, Արևմտյան Եվրոպայի և Ամերիկայի քաղաքներում պետք է սկզբնավորվեր հայ ազգային կուսակցական մամուլը:

Արևմտահայ մամուլի զարգացման հաջորդ փուլը կապվում է հասարակական հոսանքների ձևավորման ու քարոզչության խորացման հետ (1860—1870-ական թթ.): Արևմտահայ հանրության մեջ մեծ ազդեցություն են ձեռք բերում ժողովրդավարական հրատարակությունները՝ «Մեղուն» (Կ. Պոլիս, 1856—1874, ռեդակտումներով), «Մասիսը», «Մուրաթիի էրեխսը» (1859—1862), «Մաղիկը» (1861—1867, Զմյուռնիա), «Արարատը» (հայաստառ թուրքերեն, Կ. Պոլիս, 1869—1876) և այլն: Այս պարբերականների էջերում արտահայտվել են ազգային ինքնության, արևմտահայության ներքին՝ վարչական կյանքի ժողովրդավարացման, մշակույթի ժողովրդականացման նոր, առաջավոր պատկերացումներ, որոնք իրենց դրական ազդեցությունը պետք է ունենային նշված բոլոր բնագավառների վրա: Նշված թերթերն ու հանդես-

4 Ա. Ռ. Կարինյան. Անկարկներ հայ պարբերական մամուլի պատմության. հ. 2, Իրևան, 1960, էջ 127, 156:

ները սկզբունքային բանավեճ էին վարում ամիրայության և սրան փոխարինելու նկատ ազգային վերնախավի շահերն արտահայտող հրատարակությունների հետ («Երևակ», «Արևելյան դտր», «Ժամանակ», «Օրագիր», «Փունջ» և այլն)։ Ընդ որում, 1860-ական թթ. մամուլում տիրապետող զուտ ազգային կյանքի ներսում ընթացող տեղաշարժերի քննարկումն էր (վարչական, կրթական-լուսավորական, մշակութային)։ 1860-ականի վերջին և 1870-ականի սկզբին այդ մամուլը ստանում է տնտեսական ու ազգային նոր բովանդակություն, որ անմիջականորեն կապվում էր օսմանյան լծի հետագա ծանրացման և քրդական հարստահարողների կողմից արևմտահայության կեղծքումների սաստկացման, նրա իրավագրկության խորացման հետ։ Դրա հետևանքով 1870-ական թթ. արևմտահայ մամուլի առանցքային խնդիրներն են դառնում օսմանյան իրականության մեջ ժողովրդի ազգային ու տնտեսական իրավադրկության իրողությունները։ Այս թեմայի համակողմանի արծարծումը նպաստում էր արևմտահայության ազատագրական ձգտումները և ի վերջո նպաստում դրանից հետո ի հայտ եկած Հայկական հարցի՝ որպես ազգային դադափարախոսության, մշակմանն ու ժողովրդականացմանը։ 1870-ական թթ. առաջադիմական մամուլը (Հ. Պարոնյանի «Մեղուն», «Բատրոնը», «Լույսը», Կ. Փանոսյանի «Մանգումեի էֆքյարը», Մ. Մամուրյանի «Արևելյան մամուլը», Մ. Փորթուգալյանի «Ասիան» և այլ պարբերականներ) սոցիալ-տնտեսական բարեփոխումների, Բուրքիայում բարենորոգչական շարժման վերաբերյալ առաջադիմական հարցադրումներից հասավ ազատագրական գաղափարների պաշտպանությանը և ի վերջո Հայկական հարցի միջազգայնացման պայմաններում իր նպաստը բերեց հայ քաղաքական կուսակցությունների ձևավորմանը։

1870-ական թթ. մամուլը սոցիալականից զատ ստանում է նաև քաղաքական իմաստավորում նաև այն տեսակետից, որ ակտիվորեն քննարկում է Բուրքիայի քաղաքական իրականությունը՝ դրա բարեփոխումների կամ արևմտականացման հետ առնչելով արևմտահայության կացության հարավոր փոփոխությունները։ Պարբերականներում մերկացվում են ժողովրդի հարստահարման հանդեպ անտարբեր կամ դրանք խրախուսող թուրքական իշխանությունները, նրանց անդործունակությունը, արևելյան անշարժությունն ու թթամտությունը։ Այս բնագավառում առանձնապես սուր և հետևողական էր Կ. Փանոսյանի հայտառ թուրքերեն «Մանգումեի էֆքյարը», որն իր քննադատական նպատակաուղղվածության համար քանիցս դադարեցվել է թուրքական իշխանությունների կողմից։ 1877—1878 թթ. ռուս-թուրքական պատերազմի ժամանակ Կ. Փանոսյանի թերթը մերկացրել է թուրքական զորքերի վայրագությունները պատերազմի թատերաբեմ դարձած Արևմտյան Հայաստանում, ինչպես նաև խստորեն քննադատել թրքամետ հայ լրագրողների հակառուսական արամադրությունները։ Այս տեսակետից հայտնի են մանավանդ Կ. Պոյսի էֆենդիական դասի հայածանքները Փանոսյանի դեմ⁵։

1870-ական թթ. արևմտահայ մամուլը սեփական ժողովրդի վիճակը բարելավելու ակնկալությամբ դրականորեն էր վերաբերվում օսմանյան պետության և քաղաքական կյանքի ադատականացմանը։ Այս իմաստով ուշագրավ է այդ վերաբերմունքը «նոր օսմաններին» և օսմանյան առաջին սահմանադրության, 1877—1878 թթ. թուրքական խորհրդարանի գործունեության հանդեպ։ Միաժամանակ, մամուլը իր զարգացման այս շրջանում իր քաղաքական ընդդիմությունն էր հայտնում օսմանիզմի և պանօսմանիզմի, «նոր օսմաններին» գաղափարախոսության մեջ փարթամորեն ճյուղարձակող շոփինիստական այն ուղեգծին, որ հետամտում էր թուրքական զանգվածի մեջ հպատակ ազգություններին ձուլելու ծայրահեղորեն հետադիմական նպատակը։

⁵ «Մանգումեի էֆքյար», 30 հուլիսի, 4 օգոստոսի 1876։

1870-ական թթ. երկրորդ կեսին և մասնավորապես 1877—1878 թթ. ռուս-թուրքական պատերազմի ժամանակաշրջանում մամուլում աստիճանաբար խորանում է արևմտահայության հանդեպ թուրքական ու քրդական հարձականքների գործելակերպի բացահայտումը և դրա հետ կապված՝ Արևմելյան Հայաստանի վարչական ինքնավարություն հետամտող բարենորոգումների մտայնությունը։ Հրապարակախոսության առաջատար թեման է դառնում Արևմտյան Հայաստանի՝ մասնակի բարենորոգումների հարցը։ Այս մտայնությունը հայ մամուլում առավել ուժեղացավ Սան-Ստեֆանոյի դաշնագրից հետո մինչև Բեռլինի կոնգրեսին անմիջապես հաջորդող ժամանակաշրջանում։ Օսմանյան պետությունը դրան հակադրեց առհասարակ Թուրքիայում բարենորոգումների գաղափարը, որի նպատակն էր հարցի համապետական, լայնածավալ ընդգրկումների մեջ արմատախիլ անել արևմտահայերի ինքնավարական ձգտումները և Հայկական հարցն ընդհանրապես։ 1870-ական թթ. վերջին ժավաված օսմանյան գրաքննության պատժիչ միջոցառումները արևմտահայ մամուլի դեմ ամենից առաջ բխում էին ազգային բողոքի ու ինքնորոշման տրամադրությունները ոչնչացնելու նպատակից։ 1880-ական թթ. սկզբներին արդեն պատերազմում կրած պարտությունից ուշաբերվող թուրքական գրաքննությունը վերածվում է բազմաժառույց ուժային կառույցի, որը կոչվի է նետվում հայ մամուլում դրսևորվող ամեն մի ազատախոսության դեմ։ Զեկանորեն գործում էր 1864 թ. դեկտեմբերին ընդունված մամուլի օրենքը, սակայն իրականում պարբերականների վերահսկողությունը ամենուրեք ստացել էր վարչական բնույթ։ Մեկը մյուսի հետևից կամ միաժամանակ այս շրջանում խափանվում են «Մասիսը», «Մալեդումեի էֆթյարը», «Նորագիրը», «Թերեմանը էֆթյարը», «Մեհմուայը հավատիսը», «Մամուլը» և այլ պարբերականներ։ Խմբագիրները բանտի կամ աքսորի սպառնալիքով հարկադրված էին լուծված շրջանցել Հայկական հարցն ու բարենորոգումները հիշեցնող ամեն մի հարցադրում։ 1880 թ. սկսվում է համիդյան «զուլումը», երբ աննախընթաց չափերով սաստկացավ հպատակ ազգերի ճնշումը և փաստորեն նախապատրաստվեց արևմտահայության ցեղասպանությունը։ Բռնություններին հավասարապես ենթարկվում էր նաև հայատառ թուրքերին մամուլը, որը, ի դեպ, առ այսօր քիչ է ուսումնասիրված։ Մինչդեռ, այդ մամուլը նշանակալիորեն նպաստել է հայ հասարակական մտքի զարգացմանը և ազգային համախմբման գաղափարախոսության տարածմանը։ Հայատառ թուրքերին մամուլի հանդես գալը պայմանավորված էր Օսմանյան Թուրքիայում թուրքախոս հայ հատվածների առկայությամբ։ Ազգային լեզվի մոռացության պատճառ էին դարձել մի կողմից դավանանքի հարկադրված փոփոխությունը (թուրքախոս հայ կաթոլիկներ) և մյուս կողմից՝ օսմանյան ավանդական միջավայրի լեզվական ճնշումները։ Թուրքախոս այդ շերտերին հայ իրականության մեջ ներգրավելու, կրոնականից անկախ՝ ազգային ընդհանրությունը արժեքավորելու նպատակի ծնունդն էլ եղավ հայատառ թուրքերին մամուլը։ Այդպիսի առաջին հրատարակություններից էր «Ազդարար Բյուզանդյանը» (1840—1843), որը նախապես մի քանի համար հրատարակվել է հայերեն և ապա անցել հայատառ թուրքերենի։ Իր հեղինակությամբ առանձնանում էր «Մեհմուայը հավատիս» («Լուրերի ամսագիր», Կ. Պոլիս, 1852—1883) պարբերականը։ 1850—1860-ական թթ. այն խմբագրում էր Հ. Վարդանյանը կամ Հովսեփ Վարդան փաշան, որը հայ գրականության մեջ հայտնի է իր «Ազապի հիքեսի» («Աղապիի պատմությունը») վեպով։ Այս պարբերականը պաշտպանել է կաթոլիկական դավանանքը, այդ առթիվ բանավիճել հայերեն պարբերականների հետ, սակայն երբեք դավանական հակամարտության տեղիք չի ավելի։ «Մեհմուայը հավատիսը» առաջիններից մեկն էր, որ բողոքի ձայն բարձրացրեց արևմտահայության հանդեպ սուլթանի գործադրած բռնությունների դեմ։ Թերթի այդ ավանդույթը շարունակող նրա վերջին խմբագիրը՝ Հ. Թուլայանը բանտ նետվեց 1883 թ. և պարբերականը առմիշտ փակվեց։

Պաշտոնական ու կրոնարարողական բնույթ ունեւր Շ. Չամուռն-յանի «Ջոհալ» («Երեւակ», 1855—1856, Կ. Պոլիս) ամսագիրը: 1865 թ. Չամուռնյանը այն փոխարինել է արդեն հայերեն «Երեւակ» պարբերականով: «Ջոհալը» տպագրում էր հիմնականում կրոնական բնույթի նյութեր, աստվածաբանական մեկնարանություններ և այլ հրապարակումներ՝ նկատի առնելով թուրքախոս հայ ընթերցողին: Դրան հակառակ՝ ժողովրդավարական բուհանդակություն ունեւր Կ. Փանոսյանի «Մյունատիի էրճիաս» («Արգեոսի մունետիկ», Կ. Պոլիս, 1859—1862), թերթը: Փանոսյանը մամուլի ազատության համոզված պաշտպան էր և այս տեսակետից սուր քննադատության է ենթարկել սուլտան խոսրի ու կարծիքի դեմ ուղղված բռնությունները: 1862 թ. Ջեյթունի ինքնապաշտպանության օրերին «Մյունատիի էրճիասը» հանդես եկավ իրենց իրավունքը դնելով պաշտպանող լեռնցիների օգտին, որի պատճառով Կ. Փանոսյանը րանտարկվեց, իսկ «Մյունատին» ընդմիշտ դադարեց: Նարինը անց այս հրապարակախոսը հիմնեց «Մանգումեի էֆեյար» թերթը («Կարծիքների շարք», Կ. Պոլիս, 1866—1896, 1901—1917): Այն պարունակում էր աղային, հասարակական ու մշակութային հարուստ լրատվություն, և իր խմբագրի առաջավոր հայացքների համեմատ՝ զգալի ներդրում ունեցավ արևմտահայ հրապարակախոսության զարգացման ասպարեզում:

Ժողովրդավարական հրատարակություններից էր Մ. Ալվատյանի «Արարատ» թերթը: Այն սուր հարձակումներ է գործել մասնավորապես հայ էֆենդիական դասի դեմ, ծանակել նրա ազգային դիմազրկությունը և այն, որ այդ խավը արևմտահայության մեջ իրականացնում էր Բ. Դուան քաղաքականությունը: «Արարատը» րայահայտել է գավառներում թուրքական պաշտոնեություն շարաշահումները, հայ աղաքանակության նկատմամբ վայրագություններ հրահրելու: Այդ ողով գրված մի թղթակցության պատճառով Մ. Ալվատյանը դանակոծության է ենթարկվել մեծ վեղերի ընդունարանում և շատ շանցած՝ վախճանվել ստացած վնասվածքներից:

Նշված տասնամյակին լայն տարածում ունեին նաև հայատառ թուրքերեն այլ պարբերականներ, որոնց մեջ ճանաչված հեղինակություն էր «Թեր-ճեմանը էֆեյար» («Մտքերի թարգմանիչ») թերթը (Կ. Պոլիս, 1877—1884): Թերթը անդրադարձել է Արևմտյան Հայաստանի և Կ. Պոլսի հայության կյանքին, պաշտպանել հարստահարվող ժողովրդին ու բարենորոգումների զաղափարը: Կանգնած էր անկախ դավանանքից ազգային կապերն ամրացնելու դիրքերի վրա և քարսգում էր ազգային միաբանություն: Այդ թերթից հետո Կ. Պոլսում առաջին հայատառ թուրքերեն հրատարակության պատիվն անցավ «Ճերիտի շարքին» («Արեհիլյան հանդես») թերթին (Կ. Պոլիս, 1885—1921): Այս թերթը ևս հմտալի հոգվածներ է տպագրել Կ. Պոլսի հայության, Արևմտյան Հայաստանի հայ բնակչության, նրա ազգային ու մշակութային առօրյայի մասին: Հայատառ թուրքերեն առաջադիմական հրատարակությունները ուղադրավ են նաև այն տեսակետից, որ արժեքավոր նյութեր են պարունակում հասունյան-հակահասունյան պայքարի, ազգային միաբանության հարցերում արևմտահայ կաթոլիկ համայնքի վերաբերմունքի ու տարակարծությունների վերաբերյալ: 1850—1890-ական թթ. հայատառ թուրքերեն մամուլի ստեղծման գործում կարևոր ներդրում են ունեցել Շ. Հաճյանը, Ա. Սաղաթյանը, Ն. Պեղիրճյանը, Տ. Ճիվելիկյանը, Մ. Գաթամաճյանը, Շ. Թուլայանը և ուրիշներ, որոնք խմբագրել են նաև հայատառ թուրքերեն երգիծական պարբերականներ, որոնց մշակութային արժեքը առ այսօր տակավին քիչ է ուսումնասիրվել:

Հայատառ թուրքերեն պարբերականներ են հրատարակվել նաև Կ. Պոլսից դուրս, գավառներում՝ ընդհուպ մինչև Մեծ Ծղեռնը: Այսուհանդերձ, XIX դարի հայատառ թուրքերեն մամուլի խոշոր կենտրոնը մնում էր մայրաքա-

8 «Մասիս», 25 օդոստոսի, 11 սեպտեմբերի 1862:

7 Ա. Ալվատյան. Պատմություն հայ Կեսարիո. հ. 2, Կահիրե, 1937, էջ 2039:

ղաքը, որտեղ հրատարակվում էին մի քանի անգամ ավելի շատ թերթեր և ամսագրեր. քան գավառներում: Պատկերը փոխվում է XX դարի սկզբից մինչև 1915 թ., երբ այստեղ կտրուկ նվազում է հայատառ թուրքերեն թերթերի քանակը՝ գավառների նույնանման հրատարակությունների համեմատ: Պետք է եզրակացնել, որ հայ թուրքախոս հատվածները ազգային մշակույթի խառնարանում՝ Կ. Պոլսում, աստիճանաբար հեռանում էին պարտազրկած թուրքերենից և ավելի մեծ չափերով ընդգրկվում մայրենի լեզվի և դրա միջոցով՝ արևմտահայ մշակույթի և հանրային կյանքի ոլորտներ: Արևմտահայ մամուլի պատմության հաջորդ շրջանը ընդգրկում է 1880—1908 թթ.՝ համիդյան բռնապետության ժամառումից մինչև երիտթուրքական հեղաշրջումը:

1880-ական թթ. սկզբին արևմտահայության դեմ ուղղված քաղաքական բռնությունների պայմաններում հայ մամուլից դուրս են մղվում ազգային ինքնորոշման տրամադրությունները: Հրապարակախոսության մեջ առաջատար են դառնում տնտեսական ու մտավոր կյանքին վերաբերող թեմաները: Գաղափար մամուլում դառնում է վերլուծությունների միջոցով ճանաչողության անմիջական առարկա: Հրապարակվում են տեղագրական, պատմական, ազգագրական բնույթի հոդվածներ, երկրագործության, արհեստների ու առևտրի վերաբերյալ բազմաթիվ նյութեր: Կապված Արևմտյան Հայաստանի իրական կացության բացահայտման հետ՝ առաջ է քաշվում իրապաշտական գեղարվեստական գրականության, ինչպես և գեղագիտության հիմնավորման խնդիրը: Ուշագրավ է, որ ռեալիզմի հիմնավորման համար իբրև տեսական հիմք է ընդունվում պոզիտիվիզմի փիլիսոփայությունը, որ 1880-ական թթ. միաժամանակ իրականացվեց Կ. Պոլսում («Արևելք», «Գիտական և իմաստասիրական շարժում») և Զմյուռնիայում («Մետեորա»):

1880-ական թթ. մամուլում առավել խորանում են հայ երկու խոշոր հատվածների հոգևոր ու մշակութային կապերը: Թատրոնի, գրականության և հասարակական գործունեության ասպարեզներում հաստատվում են գործնական կապեր: Հայտնի են Գր. Արծրունու, Ա. Արփիարյանի, Մ. Սանասարյանի և այլոց ջանքերը՝ միասնական ուժերով Արևմտյան Հայաստանում լուսավորական ու կրթական գործը զարգացնելու ուղղությամբ: Արդյունավետ գործունեություն է ծավալում «Միացյալ ընկերությունը հայոցը», հրապարակ է դալիս «Արևելք» թերթը (1884), որի առաջատար գործիչները՝ Ա. Արփիարյանը, Գր. Զոհրապը, Տ. Կամսարականը, Լ. Բաշալյանը և ուրիշներ արևմտահայ հրապարակախոսությանը տալիս են ռեալիստական ուղղություն՝ ժողովրդի կացության ըստ հնարավորին բացահայտումը և դրա նկատմամբ իրական պատկերացում և որոշակի հասարակական կարծիքի ստեղծումը համարելով լրագրության կարևորագույն պարտականություն: «Արևելք» արևմտահայ մամուլի պատմության մեջ առաջինն է, որ առանձին անհատի (տնօրենի) սեփականությունը չէր, այլ հանդես էր դալիս որպես յուրահատուկ բաժնետիրական ընկերության սեփականություն: Թերթի նյութականը ապահովում էր հարուստ ազգայիններից կազմված նրա վարչությունը, որի հայացքները միայն մասամբ էին արտահայտվում «Արևելքի» էջերում: Վարչությունից անկախ և տարբեր դիրքավորում ունեւր նրա խմբագրական կազմը⁸, որն էլ փաստորեն որոշում էր թերթի ուղղությունը: Համիդյան բռնապետության պայմաններում մամուլի դերը առանձնապես բարձրացավ նաև նրա տպագրած գեղարվեստական երկերի շնորհիվ: Թերթերում և հանգեսներում տպագրված դրական երկերի հանդեպ մամուլի գրաքննությունը պակաս ավերիչ էր, քան գրքերի գրաքննությունը, որով և պայմանավորված էր մամուլի այս առանձնահատկությունը:

1890-ական թթ. կոտորածների ժամանակաշրջանում ծանր հարված հասավ նաև հայ մամուլի զարգացմանը: Համիդը մտահոգված էր կոտորածները առավելագույն գաղտնիության պայմաններում իրագործելու խնդրով: Նրա

⁸ «Նոր կյանք», Լոնդոն, 1899, № 19, էջ 298:

հրահանգներով՝ զրաբննությունն իրականացրեց լրատվության իսկական շրջափակում՝ մեկուսացնելով Արևմտյան Հայաստանն արտաքին աշխարհից: 1894 թ. դարնանը նույնիսկ Կ. Պոլսում շատերը չգիտեին, որ Արևմտյան Հայաստանի մի բանի շրջաններում սով է տարածվել: Խափանվեց «Ավետարանի» հանդեսը՝ դրա մասին որոշ տեղեկություններ տալու պատճառով⁹: «Թրքաց կառավարությունը,—գրում էր պոլսեցի լավատեղյակ թղթակիցը,— վարադույրը բաշած է և ծածկեր է Հայաստանի մեջ բոլոր անցած-դարձածները և այլուր Կ. Պոլսո մեջ մարդ չգիտեր, թե սով կտիրե ներսերը (իմա Արևմտյան Հայաստանում)»¹⁰։ և, հս., և ի՞նչ գիտնա այլ չէ կարող և չի էլ համարձակիր ոտքի կանգնելու և դրամ հավաքելու, վասնզի կառավարությունը չներկրե¹¹։ Հանդանակությունը բացահայտելու դեպքում թուրքական իշխան-նավորները բռնադատվում էին հավաքած գումարը: Անզլիական «Ստանդարտ» թերթը գրում էր, որ Մալաթիայի սովյալների համար հանդանակված 3500 լիրան գործածվել է այդ դավառում մզկիթ կառուցելու վրա¹²:

Հայ մամուլին խստագույնս արգելված էր լրատվություն տալ Սասունի կոտորածների մասին: Մինչդեռ, ընդհակառակն, թուրքական հրատարակությունները ողի ի բոլին ճշնում էին հերթել և վրոպական թերթերի էջերը թափանցած կցկտուր տեղեկությունները իրական դրության վերաբերյալ: Շատ զավառներում կոտորածները սկսվում և ընթանում էին նախապես մտածված և կշռադատված պլանով, 1894—1896 թթ. կոտորածներին ակտիվորեն մասնակցում էին թուրքական կանոնավոր զորքերը: Ի դեպ, երիտթուրքերը հետագայում, 1915—1916 թթ. յուրացնելու էին Աբդուլ Համիդի քաղաքականությունը՝ դավառներում, այն թուրքական պաշտոնյաները, որոնք խղճահարություն կամ ներողամտություն էին ցուցաբերում դատապարտված ժողովրդի հանդեպ, հեռացվում էին, իսկ ջանասերները պարգևատրվում էին շքանշաններով¹³:

1894—1896 թթ. արևմտահայ մամուլը ենթարկվեց շտեպսված խստագույն զրաբննության և ոստիկանական հսկողության՝ ամեն կերպ թաքցնելու համար զավառի արյունալի իրադարձությունները: «Ազգային գործերի վրա կարող են դրել պարզուպես անմեղ լուրեր հաղորդելով կամ պատրիարքարանի ժողովների որոշումները հրատարակելով... Քաղաքական լուրերը և երբեմն-երբեմն այս առթիվ խմբագրականները նույնպես անկախորեն չեն շարադրվում, հայ լրագիրները պարզապես քաղվածքներ են անում «Լեվանդ հերալդից», թուրք լրագիրների առաջնորդողներից և շատ քիչ անգամ էլ բուն և վրոպական լրագիրներից»,—գրում էր «Մշակը»¹⁴: Թուրքիայում հրատարակվող մամուլին պարտադրվեց տալ միայն իշխանությունների պատրաստած լրատվությունը՝ արևմտահայերի վիճակի մասին: Կեղծիքն ու ապատեղեկատվությունը թերթերում հասան հրեշավոր չափերի: Այդպիսի ապատեղեկատվության ցայտուն օրինակներից է Աերաստիայի կոտորածներից հասարակության ուշադրությունը շեղելու հետևյալ միջադեպը. Կ. Պոլսի թուրքական թերթերից մեկը տպագրեց Աերաստիայի իր թղթակցի մի հրապարակումը՝ «Մի գիծ կով» վերնագրով, որտեղ տեղի ազգաբնակչության հուզված վիճակը պատճառաբանում էր այն բանով, որ քաղաքում «մի գծված կով» իրարանցում է սուռչացրել¹⁵:

Մամուլին ակնդեռ հետևող սուլթանը երկրի ներքին իրավիճակին վերաբերող տեղեկատվությունը ամբողջովին հանձնեց տպագրական տեսչությանը

9 «Մշակ», 12 ապրիլի, 3 մայիսի 1894:

10 Նույն տեղում, 11 հունիսի 1894:

11 Նույն տեղում, 3 մայիսի:

12 Նույն տեղում, 11 հունիսի:

13 «Արձագանք», 8 մայիսի 1896:

14 «Մշակ», 25 փետրվարի 1895:

15 «Մուրճ», 1905, № 11—12, էջ 70:

և ոստիկանությունը¹⁶։ Գավառների մասին պաշտոնական լուրերը կազմվում էին ոստիկանությունում, որի ներկայացուցիչներն այնուհետև վերահսկում էին տպագրության գործընթացը։ Ըստ այդ պաշտոնական զեկուլցների, կյանքը գավառներում պատկերվում էր խաղաղ ու սովորական առօրյայով, բնակչությունը, իբր, ասլրում էր անվրդով ու երջանիկ կյանքով՝ «սուլթանի անսահման ողորմածության և իմաստության շնորհիվ»։ Զբաղարարվելով այս շարունակական կեղծիքով, թուրքական իշխանությունները 1895 թ. սկզբներին տեղական, այդ թվում և հայկական մամուլին սկսեցին պարտադրել մի նոր «լրագրական ժանր»՝ բնակչության շնորհակալագրերն ու գոհունակության ուղերձները սուլթանին։

Արևմտյան Հայաստանի մի քանի գավառներում թուրքական ջարդարարներին հայերը, այսուհանդերձ, ցույց տվեցին հերոսական դիմադրություն, որի արձագանքները լսելի դարձան ռուսական ու հվրոպական մամուլում։ Նախապես թուրքական իշխանություններն ընկան դժվար վիճակի մեջ, որովհետև նման լուրերը հերքում էին Արևմտյան Հայաստանի բնակչության երջանիկ կյանքի մասին պալատական հեքիաթները։ Սակայն կեղծիքը անհրաժեշտորեն պետք էր հիմնավորել կեղծիքով, ուստի և կոտորածների ամբողջ սեղծը թուրքական քարոզչությունը սկսեց վերագրել «խռովարար և շարագործ» հայ խմբերին։ 1895 թ. այս մեղադրանքը մի բուռ խռովարարներից» տարածվեց արդեն գավառական ամբողջ հայ բնակչության վրա, մինչև որ վերաճեց «դավաճան և քայքայիչ» հայ տարրին առհասարակ խարանդդ պետական քարոզչության։ Սադրանքն առավել համոզիչ դարձնելու նպատակով թուրքական պաշտոնեությունը տպագրել էր տալիս իբր գավառներից ստացված հանրագրեր՝ խոստովանություններով ու զղջման զգացումներով լեցուն։ Թուրքական «Սաբահ» թերթը 1895 թ. խաղում էր կեղծ լայնախոհություն՝ «խռովարար ու ապստամբ հայերից» տարբերելով ու նրանց հակադրելով իրենց «խաղաղասեր ու բարեհպատակ» հայրենակիցներին։ 1895 թ. սեպտեմբերի 30-ին Կ. Պոլսում հայերի զանգվածային կոտորածներից հետո ջարդերը առավել անզուսպ դարձան գավառներում։ Դրանից հետո իշխանությունները հայ մամուլի դեմ անցան ոչնչով չսահմանափակված բռնությունների։ Հայ խմբագիրներին («Արևելք», «Հայրենիք», «Ժերիտեի շարքից» և այլն) ոստիկանությունը ստիպում էր տպագրել հակահայկական հոդվածներ՝ վերը նշված մեղադրանքների ոգով։ Կաշառքին ու սպառնալիքներին տեղի տվեցին նաև Կ. Պոլսի ֆրանսերեն ու անգլերեն պարբերականները, որոնք տպագրեցին այդ բնույթի խմբագրականներ։ Ոստիկանությունը հուսահատ դիմադրություն ցույց տվեցին «Արևելքը», «Ժերիտեի շարքից» և մանավանդ «Հայրենիքը», որոնք զանազան սլատրվակներով խուսափեցին պարտադրված խմբագրականները տպագրելուց։ Ի տարբերություն վերոհիշյալ թերթերի, ոստիկանության հրահանգներին անմոռն ինքնարկվեցին «Փունջը», «Լույսը» և ազգային շարժման հանդեպ իր երեմնի առաջադիմական դիրքը կտրուկ փոխած «Մանգուլեի էֆքյարը», որոնք դատապարտում էին գավառների և Կ. Պոլսի հայերին «մոլորեցնող» անհեռատեսներին։ Հակառակ մտայնությունն արտահայտող «Հայրենիքը» 1896 թ. հուլիսին խափանվեց և վերահրատարակվեց 1909 թ.՝ համիդյան միապետության վախճանից հետո¹⁷։

Կոտորածներից հետո և միջազգային հասարակայնության ուշադրության պայմաններում սուլթանն անցավ կատարվածը շնչին չափերի հասցնելու միջոցով հետքերը քողարկելու քաղաքականությանը՝ փոքր-ինչ թուլացնելով հսկողությունը հայ մամուլի հանդեպ։ Սրանով պետք է բացատրել, թե ինչու Բ. Քեչյանին 1896 թ. արտոնվեց «Բյուզանդիոնի» հրատարակությունը։

1890-ական թթ. կեսից մինչև համիդյան բռնակալության ավարտը արևմբարտահայ մամուլն ու հրապարակախոսությունը խիստ ճնշումների ներքո

16 «Արձագանք», 20 հունվարի 1895։

17 «Հայրենիք», 19 հուլիսի 1909։

գրկվեցին աղղային ու հասարակական սրությունից: Հրապարակախոսությունից չքացավ քննադատական լիցքը, քաղաքական հարցեր շոշափելու հնարավորությունը, ազգային կարևոր հիմնահարցերի վերլուծությունը, որ հասարակական հնչելություն էր ստացել 1880—1890-ական թթ. «Արևելքում», «Մասիսում» և «Հայրենիքում»: 1896—1908 թթ. «Արևելքում», «Մանգումեի Լիքթարում», «Մասիսում» և «Բյուզանդիոնում» վերակենդանացավ բարոյախոսական հրապարակախոսության ժանրը, որ հաղթահարվել էր դեռևս 1850—1860-ական թթ. մամուլում: Փոխարենը, նկատելի զարգացում ապրեցին դավառին նվիրված հրապարակումները, որոնք վերաբերում էին ժողովրդի կենցաղին, սովորույթներին, տնտեսական ու կրթական իրողություններին: Տարածված թեմաներից մեկը դարձավ հոգևորականության գործունեությունը, մանավանդ՝ եկեղեցու առաքինությունից շեղվող հոգևորականության քննադատությունը: Նշված հրեույթները հնարավորություն են տալիս ասելու, որ այս ժամանակահատվածում արևմտահայ մամուլը որքան էլ տարուբերվեր վերացականի և ողողակիի սահմաններում, զգալիորեն մոտենում էր գավառական իրականությանն ու ժողովրդի կյանքին, ընդառաջում մտավոր նոր պահանջներին: Այս տեսակետից մամուլի և հրապարակախոսության մեջ կարևոր ներդրում արեցին այնպիսի գործիչներ, ինչպես Հ. Գազանճյանը, Ա. Անտոնյանը, Հ. Մամուրյանը, Մ. Դոշունյանը, Օ. Զիֆթե-Սարաֆը, Հ. Ալիարը, Ռ. Զարդարյանը, Ա. Հարությունյանը, Բ. Քելյանը Մ. Շամտանճյանը և ուրիշներ:

Արևմտահայ մամուլի նախընթաց և մյուս փուլերի բնութագրական մի կողմն են ներկայացնում նաև կրոնական պարբերաթերթերը: Կրոնական հրատարակություններ են ունեցել, ժամանակագրական կարգով, նախ ամերիկյան բողոքական միսիոներները («Շտեմարան պիտանի գիտելյաց», Զրմուլունիա, 1839—1854, «Ավետարան», Կ. Պոլիս, 1855—1915), այնուհետև Հայաստանյայց Առաքելական եկեղեցու պաշտոնական դավանանքը պաշտպանող հրատարակությունները («Լույս», Արմաշ, 1864—1878, «Սիոն», Երուսաղեմ, 1866—1877) և ապա հայ կաթոլիկները («Պատկեր», Կ. Պոլիս, 1890—1901, «Կաթոլիկե արձագանք», Կ. Պոլիս, 1911—1915): Հայ եկեղեցու քարոզչությունն են իրականացրել նաև «Լույս» (Կ. Պոլիս, 1874—1885, 1905—1907), «Բուրաստան մանկանց» (Կ. Պոլիս, 1882—1890), «Եկեղեցի Հայաստանյայց» (Կ. Պոլիս, 1887—1889), «Խոսնակ Հայաստանյայց եկեղեցվո» (Կ. Պոլիս, 1888) և այլ պարբերականներ:

Արևմտահայ մամուլի գոյության հաջորդ փուլը ընդգրկում է համիդյան ռեժիմի տապալումից մինչև ցեղասպանության իրականացման ժամանակաշրջանը (1909—1914): Այս փուլի կարևոր նորույթն էր այն, որ Կ. Պոլսում և գավառներում հայտնվեցին հայ ազգային կուսակցությունների հրատարակությունները, որպիսիք մինչ այդ բացառապես լույս էին տեսնում արտասահմանում: 1909—1914 թթ. ընթացքում Կ. Պոլսում լույս են տեսել «Ազատամարտը», «Առաջամարտը», «Բյութանիան», «Բագինը» (Հայ Հեղափոխական Դաշնակցություն), «Ապագան», «Կայծը» (Ս.-Դ. Հնչակյան կուսակցություն), «Դաշինքը», «Վերածնունդը», «Ռամկավարը» (Սահմանադրական Ռամկավար կուսակցություն), «Կոհակը», «Դալլալիկը» (սոցիալ-դեմոկրատական ուղղության) և այլ պարբերականներ:

1908—1914 թթ. մամուլի մյուս կարևոր նորույթը, թերևս, պետք է դիտել բուն Արևմտյան Հայաստանում (գավառներում) զգալի քանակով թերթերի հայտնությունը: Այս հանդամանքը կապվում էր գավառներում ազգային ինքնագիտակցության վերելքի և վերը նշված՝ ազգային կուսակցությունների գործունեության աշխուժացման հետ: Թերթեր են տպագրվում Վանում, Մարզվանում, Եվդոկիայում, Մուշում, Բրուսայում և այլուր: Հատկանշական է, որ այս պարբերականների մեծ մասը արդեն դադարել էր 1912 թ., որը Ողեռնին նախորդող շրջանում հայերի հանդեպ երիտթուրքերի թշնամական քաղաքականության հետևանքն էր: Երիտթուրքերը ձգտում էին աստիճանա-

բար վերացնել կամ խիստ սահմանափակ դարձնել հայերեն թերթերի հրատարակությունը հնարավորությունները մասնավորապես զավառներում: 1914 թ. ամբողջ Արևմտյան Հայաստանում տպագրվում էր շուրջ մեկ և կես տասնյակի չափ հայերեն պարբերական (գլխավորապես թերթեր), որոնք բնօրին էլ դադարեցին 1915 թ.: Եվ ընդհանրապես, 1915—1917 թթ. ամբողջ արևմտահայ մամուլը գրեթե դադարել էր գոյություն ունենալուց՝ երիտթուրքերի ձեռնարկած ցեղասպանության հետևանքով:

ИЗ ИСТОРИИ ФОРМИРОВАНИЯ И РАЗВИТИЯ ЗАПАДНОАРМЯНСКОЙ ПРЕССЫ (1832—1914 гг.)

Доктор ист. наук А. А. ХАРАТЯН

Р е з ю м е

1830—1850-ые годы — начальный период развития западноармянской прессы, когда в условиях национального пробуждения развиваются информационная система печати, журналистика и публицистика. Следующий этап связывается с формированием общественных течений (1860—1870-е гг.). В эти годы в прессе обсуждались вопросы улучшения условий жизни западных армян, упорядочения административной системы, развития культуры и просвещения. В частности, в демократических изданиях были отражены идеи национально-освободительной борьбы армянского народа против турецкого гнета. Следует выделить 1880—1890 годы, период гампловской реакции в Османской Турции. Отдельным этапом истории западноармянской прессы можно считать 1908—1914 гг., предшествовавшие геноциду армян.

FROM THE HISTORY OF FORMATION AND DEVELOPMENT OF THE WEST ARMENIAN PRESS (1832—1914)

Dr. of the Hist. Sc. A. A. KHARATIAN

S u m m a r y

The 1830s to the 1850s were the initial period of the development of the West Armenian Press, when at the time of national awakening information system of press and journalism were evolving. The next stage is connected with the formation of social tides (1860—1870). During this period, the problems of bettering the life conditions of the West Armenians, the question of the regulations of the administrative system and the development of culture and education were discussed. Particularly, the ideas of national liberation struggle of the Armenians against the Turkish yoke were reflected in democratic publications. 1880—1890 are to be noted as a period of hamidian reaction of Ottoman Turkey. 1908—1914, years preceeding the Genocide of the Armenians, may be regarded as a distinct period in the history of the West Armenian press.